



O vinte de xuño de mil novecentos noventa e cinco, a Consellería de Educación e Ordenación Universitaria e as organizacións sindicais ANPE, CC.OO, CSI-CSIF e FETE-UGT asinaron un Acordo sobre o acceso á Función Pública Docente en calidade de profesor interino ou substituto, no que o profesorado que realizou interinidades e substitucións ten prioridade para ser novamente nomeado sempre que non renunciase a unha interinidade ou substitución que se lles tivese ofertado.

O 30 de setembro de 2002, as organizacións sindicais CC.OO, CSI-CSIF e FETE-UGT asinaron unha ADDENDA ao Acordo do vinte de xuño de mil novecentos noventa e cinco, no que se recolleron algunhas melloras referidas á opción de non realizar interinidades ou substitucións no suposto de alegar e xustificar que se ten un contrato de traballo ou que se presta servizos noutro posto do sector público, ou para atende-lo coidado dun fillo menor de tres anos ou dun familiar ata o segundo grao de consanguinidade ou afinidade.

Asemade, os apartados 5 e 6 da base décimo primeira da Resolución do 26 de maio de 2005, da Dirección Xeral de Persoal, pola que se ditan normas para a adxudicación de destino provisional para o curso académico 2005/2006, entre profesores de ensino secundario, profesores técnicos de formación profesional, profesores de escolas oficiais de idiomas, profesores de música e artes escénicas, profesores e mestres de taller de artes plásticas e deseño, que non teñan destino definitivo na Comunidade Autónoma de Galicia, complementaron a addenda ao acordo do vinte de xuño de mil novecentos noventa e cinco, no senso de que o profesorado interino e substituto que non obtivese praza na adxudicación de destinos podería acollerse a prestar servizos nunha provincia, ampliar a idade do coidado dun fillo de 3 a 6 anos e estender esta posibilidade a outros supostos.

Finalmente, tratouse na mesa sectorial docente non universitaria a regulación do acceso e das condicións de traballo do persoal docente interino e substituto, determinándose varias melloras do Acordo do 20 de xuño de 1995, que se concretan na seguinte ADDENDA:

Primeiro.- OFERTA DE EMPREGO PÚBLICO

A Consellería de Educación e Ordenación Universitaria establece como obxectivo que o número de interinos dos corpos docentes que imparten docencia distinta da universitaria sexa en torno ao cinco por cento dos cadros de persoal.

Para acadar este obxectivo, a Consellería de Educación e Ordenación Universitaria realizará, durante o período previsto na disposición transitoria décimo sétima da Lei Orgánica de Educación, amplas ofertas de emprego, previa negociación na mesa sectorial docente non universitaria.

No proceso de negociación das ofertas de emprego teranse en conta, ademais das xubilacións que se produzan e as novas necesidades derivadas das políticas educativas, os resultados producidos no relativo ao acceso do persoal interino docente á condición de funcionario de carreira, no desenvolvemento dos concursos-oposicións inmediatamente anteriores.

Segundo.- Para que os participantes nos procedementos selectivos pasen a formar parte das listas de interinos ou substitutos deberán acreditar o coñecemento da lingua galega no propio procedemento, a través da superación da proba ou por estaren exentos da realización da mesma.

Terceiro.- Cando exista a mesma especialidade en máis dun corpo e se convoque no mesmo ano concurso-oposición nos dous corpos, elaborárase unha lista única integrada polos opositores que non superaron os procedementos selectivos, intercalándose pola orde de puntuación, conforme ao previsto no parágrafo anterior.

Cuarto.- Mentres non se cree a lista única e se convoque concurso-oposición da especialidade de “Primaria” do corpo de mestres, para cubrir as necesidades de educación primaria ou, se é o caso, outras prazas sen perfil, elaborárase unha lista xeral ordenada conforme aos criterios previstos no parágrafo anterior.

Convocado o concurso-oposición na especialidade de “Primaria”, manterase a dobre lista de especialidade e xeral para aquelas persoas que accedesen a unha interinidade ou substitución con carácter previo á resolución de dita convocatoria.

Quinto.- O profesorado interino procedente dos centros dependentes do Instituto Social da Mariña integraranse nas listas, no corpo e especialidade correspondente, coa antigüidade que acrediten nestes centros.

Sexto.- O apartado terceiro. 2 do Acordo do 20 de xuño de 1995 queda redactado do seguinte xeito:

“Terceiro. 2 - CONVOCATORIAS DE LISTAS DE INTERINIDADES E SUBSTITUCIÓNS

Se unha vez realizado chamamento a todas as persoas que constan nas relacións mencionadas no apartado segundo, continuase resultando necesario cubrir necesidades de profesorado, a Consellería de Educación e Ordenación Universitaria, previa comunicación ás organizacións sindicais con presenza na mesa sectorial docente non universitaria, procederá a abrir un prazo de solicitudes, aplicándose o baremo publicado na fase de concurso do último concurso-oposición convocado, sendo requisito imprescindible a acreditación de coñecementos de lingua galega a través da presentación do curso de perfeccionamento da lingua galega ou a correspondente validación ou equivalencia”.

Sétimo.- CONVOCATORIAS DE LISTAS ESPECÍFICAS DE INTERINIDADES E SUBSTITUCIÓNS E DE PROFESORADO ESPECIALISTA

A Consellería de Educación e Ordenación Universitaria poderá realizar convocatorias específicas, para cubrir temporalmente prazas de “profesorado especialista”, de profesorado de artes plásticas e deseño, para a impartición das ensinanzas superiores e nas especialidades relativas á escola de arte dramática, aplicándose o

baremo que previamente se negocie na mesa sectorial docente non universitaria.

Oitavo.- PRAZAS DE ACEPTACIÓN VOLUNTARIA

Cando as prazas ofertadas sexan de itinerancia, ou de tempo parcial, ou a desempeñar nos cárceres, ou outras de réxime especial que determine a Consellería de Educación e Ordenación Universitaria, oída a comisión de seguimento do presente Acordo, o aspirante poderá non efectuar solicitude destas prazas, sen que iso implique a renuncia ás listas e aos próximos chamamentos que lle correspondan. Asemade, poderán rexeitar estas prazas nos chamamentos que se produzan.

Noveno.- Os apartados primeiro.3.4 e 3.5 da ADDENDA do 30 de setembro de 2002 quedan redactados do seguinte xeito:

“ RENUNCIAS

1. Os profesores interinos e substitutos terán dereito a non aceptar as interinidades ou substitucións que se lle ofrezan, sen perde-lo número de orde na lista correspondente, por un período mínimo dun curso académico ou polo que reste de curso académico, desde a súa solicitude, polas seguintes causas:

- Para atender o coidado dun fillo menor de seis anos, tanto cando o sexa por natureza ou por adopción ou acollemento permanente ou preadoptivo.
- Para atender o coidado dun familiar que se teña ao seu cargo, ata o segundo grao de consanguinidade ou afinidade que, por razóns de idade, accidente ou enfermidade, non poida valerse por si mesmo, e non desempeñe actividade retribuída.
- Por enfermidade grave
- Por ter concedida unha bolsa de estudos.

- Por ampliación de estudos. Enténdese que hai ampliación de estudos cando se realiza o doutorado ou estudos para obter un título superior

ou do mesmo nivel ao que se posúe, así como a formación no estranxeiro de linguas ou nas ensinanzas de réxime especial.

- Por ser vítima de violencia de xénero
- Por calquera das circunstancias que permite aos funcionarios públicos a concesión dos servizos especiais.

Esta decisión deberá adoptarse, en todo caso, no prazo de reclamacións á adxudicación provisional de destinos para o curso académico que proceda, agás que teña a súa orixe en causa sobrevida con posterioridade.

2.- Os profesores interinos e substitutos poderán solicitar non ser chamados para as prazas que puidesen corresponderlles, por un período máximo e improrrogable de tres cursos académicos, que non terán que ser necesariamente consecutivos, sempre que aleguen e xustifiquen que teñen un contrato de traballo de carácter temporal ou prestan servizos, tamén con carácter temporal, noutro posto do sector público.

3.- Este prazo empezará a computarse a partir do curso académico 2006-2007.

4.- Non será posible efectuar esta opción unha vez producido o nomeamento de interino ou substituto, agás causa sobrevida ao nomeamento.

5.- O profesorado ao que se fai referencia neste punto oitavo poderá optar, durante os períodos máximos e mínimo previstos no mesmo, por realizar substitucións nunha zona educativa”.

Décimo.- TOMA DE POSESIÓN

1.- As tomas de posesión das interinidades e substitucións que non coincidan co comezo do curso, realizaranse no centro educativo no día lectivo inmediatamente seguinte ao do nomeamento. O centro remitirá á

Delegación Provincial da Consellería de Educación e Ordenación Universitaria, no prazo de vinte e catro horas desde a toma de posesión, esta toma de posesión e os documentos asinados polo interino ou substituto que estableza a propia Delegación Provincial.

2.- A falta de toma de posesión implicará o decaemento do dereito ao nomeamento realizado e á permanencia nas listas.

3.- A aquelas persoas que non poidan tomar posesión por encontrarse de baixa por enfermidade ou con permiso de maternidade reservaráselle o posto ata que se encontren en situación de alta, nomeando ata tanto a outro profesor substituto. No caso de permiso maternal, o tempo transcorrido nesta situación será computable para os efectos administrativos como de servizos efectivos prestados.

Décimo primeiro.- ELECCIÓN DE PROVINCIA OU PROVINCIAS

O profesorado interino e substituto que non obteña praza na adxudicación de destinos provisionais para un curso académico poderá acollerse, sen necesidade de causa xustificada, a prestar servizos como interino ou substituto nunha ou en máis dunha provincia. O que non efectúe petición enténdese que opta por prestar servizos en tódalas provincias da Comunidade Autónoma.

Duodécimo- DEREITOS RETRIBUTIVOS DO PROFESORADO SUBSTITUTO.

1.- A partir do inicio do curso académico 2006/2007, o profesorado substituto que preste servizos efectivos nun curso académico durante polo menos cinco meses e medio, terá dereito a que se lle efectúe un

nomeamento polos días do mes de agosto que procedan, unha vez deducidos os aboados por vacacións non gozadas.

2.- A partir do inicio do curso académico 2007/2008, o profesorado substituto que preste servizos efectivos nun curso académico durante polo menos cinco meses e medio, terá dereito a que se lle efectúe un nomeamento polo mes de xullo e polos días do mes de agosto que procedan, unha vez deducidos os aboados por vacacións non gozadas.

3.- Para os efectos do cómputo dos cinco meses e medio de servizos efectivos non se terán en conta os días aboados por vacacións non gozadas.

4.- Si será computable para os efectos da determinación dos cinco meses e medio de servizos efectivos o tempo transcorrido en baixa maternal, tanto para a nai como para o pai, se este gozou dunha parte do permiso.

5.- Para ter dereito a este nomeamento polos días do mes de xullo e de agosto que procedan será preciso acreditar non estar dado de alta no réxime da seguridade social ou de autónomos nos devanditos meses.

6.- Non terán dereito a este nomeamento polos días do mes de xullo e de agosto aqueles substitutos que soliciten non ser chamados nalgún momento do curso académico, en virtude do previsto no apartado oitavo do presente Acordo e os que perdesen o dereito ao chamamento, segundo o disposto no apartado seguinte.

Décimo terceiro.- CAUSAS DE PERDA DO DEREITO Á PERMANENCIA NAS LISTAS DE CHAMAMENTOS

Decaerán no seu dereito a estar nas listas e aos chamamentos os candidatos :

- a) Que non acepten unha praza de interinidade ou substitución que se lles oferte, agás que exista unha das causas xustificadas que se citan no punto oitavo do presente acordo.
- b) Que sexan sancionados con suspensión de funcións en razón de expediente disciplinario.

- c) Os que non tomen posesión da praza adxudicada, no día lectivo inmediatamente seguinte ao do nomeamento, agás causa xustificada libremente apreciada pola Secretaria Xeral, previo informe á comisión de seguimento.

- d) Por falta de capacidade para desempeño do posto, manifestada por rendemento insuficiente, que non comporte inhibición e que impida realizar con eficacia as funcións atribuídas, previo expediente contradictorio e oída a comisión de seguimento prevista no apartado décimo cuarto.

- e) Non concorrer aos procedementos selectivos agás causa xustificada.

Décimo cuarto.- Para unha mellor comprensión, as partes asinantes da presente ADDENDA acordan que a Consellería de Educación e Ordenación Universitaria efectúe unha refundición do Acordo do 20 de xuño de 1995 e todas as súas modificacións posteriores.

Santiago de Compostela, 11 de xullo de 2006

Pola Consellería de Educación e Ordenación Universitaria

Asdo: Benito Fernández Rodríguez

Polas Organización Sindicais

Por CC.OO

Por ANPE

Asdo.: Rosario M. Alonso Fernández

Asdo.: Julio Díaz Escolante

Por CSI-CSIF

Asdo.: Emérita Fernández Díaz